


Stefan Loringett (1891–1970)

redactur da la part sutsilvana digl CPMG 1952 a 1953

Stefan Loringett da Vargistagn e naschieu igl amprem da marz 1891 a Scuol sco fegl digls purs Risch a Johanna, naschida Moser, da Wildhaus. El â visito las scolas obligatoricas a Maton, Scuol a Ziràn ad â frequento suainter igl Seminari da surmesters a Cuira. Davent da 1912 e el sto surmester a Scuol, Maton ad Andeer. El e sto secretari da la Leia Rumàntscha da 1919 tocen 1932 a digl Institut digl Dicziunari Rumantsch Grischun tocen igl on 1926. Da 1926 tocen 1956 e el sto agent general da la Sozietad da sirànzas Wnterthur.

Stefan Loringett â marido la Deta, naschida Tschurr. Lur feglia Riccarda e morta 1942, sia cunsorta 1948. Igl on 1949 â Loringett marido egna savund'eada, numnadameing la Maria, naschida Calonder.

Igl angaschi da Stefan Loringett e strusch da numnar an pocs pleds. Da 1946 tocen 1963 e el sto president da la Leia Rumantscha. El e plenavànt sto activ cun la plema, oravanttut sco poet a translatur. Anzaquàntas ovras en vagnidas publitgeadas agl cudesch *Sur pùnts a pitgognas* igl on 1966. El e sto president da la Cumissiùn cantunala par mieds d'instrucziùn ad autur príncipal da la fibla rumàntscha da 1921. Pigls seas maretts à Stefan Loringett survagnieu igl dr. h. c. da l'Universitat da Turitg igl on 1962 ad e vagnieu undro agl Curtgegn d'anur da la Ligia Grischa a Trun. El e mort igls 6 da zarcladur 1970 a Cuira.



Stefan Loringett e d'antscheata davent sto egn promotur digl movimaint rumàntschi an Sutselva. El e sto cuniniziànt da l'Uniùn rumàntscha Val

*

Schons, da la Renania a da la Cuminànya Culturala Val Schons. El e sto president da la Renania da 1931 tocen 1944 ad â luvro gràndameing par quell'uniùn. Igl on 1951 â el iniztgiu la giaseta *La Pùnt* a redigieu quella. El â supriue la redacziùn sutsilvana digl CPMG 1952 a 1953. Nus schan savundar la poesia *Credo*, cumparida agl sieus tom *Sur pùnts a pitgognas* sen las paginas 33 a 34.

Credo

*Dess jou saver partge
ca samartuir
notgs or an uras aleartas
cun l'amparada:
Co sa igl pled rumàntsch
puspe fitgear pe
agsl noss unfànts?
An quels ca damàn
a puschnàn saran
clamos da vigliear
a ver quito pigl bagnstar
da tgierp a spiert
digl noss pievel?*

*Jou cre betg
ca vegi d'amparar
suainter que partge
ca vean cumando
da davains or!
Da surangiou!
Ca jou sto semplameing far,
segi par ambitzgùn
par raspunsavladad
tge se jou partge.
Mo jou se ca sto ir
quella veia gi par gi
toc'igl davos.*

*Toca Nossegner gi:
Uss e'gl bien,
ussa me possa!
Mintga garnetsch-sablùn
vean mess a liac
sco jou vi!
Ad ear mintga bùn fatg
a partratg
aschi pintg sco'l po easser
vean scret dabien
ainten igl cudesch da la veta!*

*Ad igl pled
ca tei âs adigna managieu
e sto igl mieus pled
a quel de easser rumàntsch
par igls rumàntschs!
Anzuma vagnir do
a mintgegn an la si'lieunga!*

*Ussa me possa,
gl'e sto scoglsasoda
quegl ca tei âs fatg!*